

दिनांक : 21.03.2026

समय : 18.45 बजे

आकाशवाणी जयपुर—अजमेर

समाचार

- राष्ट्रपति द्रौपदी मुर्मू आज ब्रज हलकां रा गिरिराज जी री परिक्रमा लगा र देश मांय सुख—समृद्धि री कामना करी।
- केन्द्रीय मंत्री भूपेन्द्र यादव देश रा विकास सारु अर्थव्यवस्था अर पारिस्थितिकी रा संतुलन ने बणायो राखण माथे जोर दियो।
- प्रदेशभर मांय ईद—उल—फित्र अर गणगौर रो तिंवार रीत मुजब धार्मिक उमाव रे साथे मनायो जावे।

अर

- आथूणी विक्षोभ रा असर उं प्रदेश रा घणखरा जिलां मांय तापमान मांय कमी—जैसलमेर, बाड़मेर अर आरे—सारे रा जिलां मांय हळकी बिरखा री आस।

000

राष्ट्रपति द्रौपदी मुर्मू आज ब्रज हलका रा गिरिराज जी री परिक्रमा लगा र देश मांय सुख समृद्धि री कामना करी। आपरा दौरा रे तीजे अर आखिरी दिन आज राष्ट्रपति गोवर्धन मांय दानघाटी मिंदर मांय पूजा—अर्चना करी। परिक्रमा रे दौरान राष्ट्रपति रे राजस्थान पूगण माथे जिला प्रभारी मंत्री सुरेश सिंह रावत अर गृह राज्य मंत्री जवाहर सिंह बेढम वांरो स्वागत कर्यो। ई मौके लोक कलाकारां कानी उं राष्ट्रपति रा स्वागत मांय भावपूरण प्रस्तुति दीरीजी। ब्रज रा नामी मयूर नाच अर कृष्ण भजन रो गायन करीज्यो। राष्ट्रपति कलाकारां रो हौंसलो बधायो अर सगळा ने शुभकामनावां दी।

ध्यानजोग है के राष्ट्रपति गुरुवार ने चैत्र नवरात्र रे पैले दिन अयोध्या मांय राम जन्मभूमि मिंदर रा दर्शन कर्या। इण रे पछे वणां वृंदावन रा इस्कॉन मिंदर अर प्रेम मिंदर मांय पूजा—अर्चना करी। राष्ट्रपति काले रामकृष्ण मिशन सेवाश्रम मांय कैसर रा खात्मा अर इलाज सारु खास ब्लॉक रो ई उद्घाटन कर्यो।

000

रक्षामंत्री राजनाथ सिंह कह्यो है के केई हलकां मांय चाल रही कलह रे कारण दुनिया संकट रा दौर उं गुजर री है। वणां कयो के आथूणी एशिया मांय चाल रिया हमला नी फगत भारत बल्कि आखी दुनिया सारु चिंता रो मुद्दो है। आथूणी एशिया मांय व्हे रिया संघर्ष उं पैदा व्हे री ऊर्जा अर खाद्य संकट ने ले र वणां कयो के प्रधानमंत्री नरेन्द्र मोदी री अगुवाई मांय देश अजे तांई ई संकट उं घणा हद तांई हिफाजती है। श्री सिंह आज उत्तराखंड रा हल्द्वानी मांय व्हीया एक कार्यक्रम मांय बोल रिया हा। वणां कयो के ई मुद्दा माथे भारत रो रुख साफ है। रक्षा मंत्री कयो के संवाद अर कूटनीति री मार्फत समाधान निकालयो जावणा चाईजे।

.....

000

केन्द्रीय रोकड़ मंत्री निर्मला सीतारामन काले नुवी दिल्ली मांय आयकर कानून 2025 माथे देशव्यापी जागरूकता अभियान 2026 री सरुआत करी। ओ अभियान प्रिंट, रेडियो, टेलीविजन, आउटडोर, डिजिटल अर सोशल मीडिया रे तैत चालेला। वित्त मंत्री कयो के आयकर कानून 2025 उं खामियां, विवाद अर अनुपालन लागत कम व्हेला।

000

आज अंतरराष्ट्रीय वन दिवस है। दुनियाभर मांय जंगळां अर जिनावरां री कम व्हेती तादाद ने बचाया रा राखण अर वां रे प्रति वैश्विक प्रतिबद्धता रे तैत ओ दिन मनायो जावे है। ई मौके केंद्रीय पर्यावरण, वन अर जलवायु परिवर्तन मंत्री भूपेंद्र यादव देश रा विकास सारु माली बंदोबस्त अर पारिस्थितिकी रे बीचे तालमेल बणाया राखण री जरूरत माथे जोर दियो है। अंतरराष्ट्रीय वन दिवस रे मौके देहरादून मांय व्ही दो दिन री राष्ट्रीय कार्यशाला रा उद्घाटन सत्र मांय वणां कयो के ई संतुलन ने हासिल करण सारु विज्ञान रो नजरियो जरूरी है।

ध्यानजोग है के संयुक्त राष्ट्र महासभा साल 2012 मांय 21 मार्च ने अंतरराष्ट्रीय वन दिवस रा रूप मांय ऐलाण कर्यो है। प्रदेश मांय ई अंतरराष्ट्रीय वन दिवस रे मौके न्यारा-न्यारा कार्यक्रम व्हीया। जयपुर रा राजस्थान इंटरनेशनल सेंटर मांय राज्य थर रो कार्यक्रम व्हीयो। इण मांय वन राज्य मंत्री संजय शर्मा घायल जंगली जीवां ने बचावण ने मजबूत बणावण सारु 5 रेस्क्यू वाहनां ने हरी झंडी दिखाई। इण रे साथे ई जंगळात हलका मांय प्रभारी मॉनिटरिंग सारु 460 मोटरसाईकिलां ने रवाना कर्यो। कार्यक्रम मांय ठावा काम करण वाळा वनकर्मियां रो सनमान करी ज्यो। ई दौरान श्री शर्मा एक पेड़ माँ के नाम अभियान माथे कॉफी टेबल बुक रो ई विमोचन कर्यो। वठे ई जैसलमेर रा मोहनगढ़ मांय जवाहर नवोदय विद्यालय परिसर मांय पौधरोपण करी ज्यो। पढेसरां आम, जामुन, आँवला समेत कई कामजोग पौधा लगाया अर पौधां री बरोबर देखभाळ रो संकल्प लियो।

सवाईमाधोपुर मांय वन महकमा कानी उं जागरूकता कार्यक्रम राखी ज्यो। वठे वनों के महत्व अर जैव विविधता जस्या मुद्दा माथे जाणकारी दीरीजी।

000

ईद-उल-फित्र रो तिंवार आज अकीदत अर एहतराम रे साथे मनायो जावे। संवारा ईदगाहां अर मस्जिदां मांय खास नमाज अदा करीजी अर अमन चैन री दुआ मांगीजी। जयपुर मांय दिल्ली रोड ईदगाह मांय ईद री मुख्य नमाज अदा करीजी। नमाज रे पछे न्यारा-न्यारा सामाजिक संगठनां रा लोगां नमाजियां माथे फूल बरसाया अर भाईचारा रो संदेश दियो। मुस्लिम बाहुल्य हलका मांय संवारा उं ई खास उमाव देखी ज्यो। जयपुर रा रामगंज, गलतागेट, दिल्ली रोड समेत परकोटा रा हलकां मांय बाजारां ने खास सजाई ज्यो है। लोग एक दूजा रे गळे मिलने मुबारकबाद देवता खीर सेवईयां उं मूंडो मीठो करा रिया है। अजमेर रा ख्वाजा मोइनुद्दीन हसन चिश्ती री दरगाह माथे घणी तादाद मांय अकीदतमंद पूग्या। ई मौके खोलीज्या जन्नती दरुजां उं गुजरण ने लै र लोगां मांय घणो उमाव निजर आयो। जोधपुर, सीकर, उदयपुर, राजसमंद, बांसवाड़ा, सलूमबर अर भरतपुर समेत प्रदेश रा न्यारा-न्यारा हलकां मांय ईद रे मौके खास नमाज अदा करने अमन चैन री दुआ मांगीजी। ई मौके हिफाजत रा पुख्ता बंदोबस्त करीज्या।

000

अखण्ड सुहाग रो प्रतीक गणगौर रो तिंवार आज रीत मुजब धार्मिक उमाव रे साथे मनायो जावे। प्रदेश रा न्यारा-न्यारा हलकां मांय सुहागिनां गणगौर री पूजा करने आपरा सुहाग री लांबी उमर री कामना करी। केई शहरां मांय गणगौर माता री रीज मुजब सवारी निकाळी जी। राजधानी जयपुर मांय लोक पर्व गणगौर रो उमाव निजर आवे। सिटी पैलेस रा जनानी ड्योढी उं गणगौर री शाही सवारी रवाना व्ही।

चूरु मांय गणगौर पर्व उमाव साथे मनायो जावे। शहर मांय गणगौर माता री सवारी निकाळी जी अर पावटा कुंआ माथे मेळो भरीज्यो। झुन्झुनू मांय ईसर गणगौर री सवारी निकाळीजी। आ सवारी शहर रा

खास मार्गां उं व्हेला समस तालाब पूगी, जठे रीत मुजब पूजा रे साथे विसर्जन री रसम अदा करीजी। जोधपुर मांय ई मौके शोभाजात्रा निकाली जावे। और ब्यौरो म्हारा खबरनवीस उं –

000

जल शक्ति मंत्रालय 23 मार्च ने नुवी दिल्ली मांय विश्व जल दिवस सम्मेलन व्हेला। ई सम्मेलन रा उदघाटन सत्र मांय केंद्रीय जल शक्ति मंत्री सी.आर. पाटिल अर उद्योग जगत रा ठावा नुमाइंदा भेळा व्हेला। मंत्रालय बतायो के “जल के लिए उद्योग” मुद्दा माथे ओ सम्मेलन सतत जल प्रबंधन सारु बतळ, नवाचार अर मदद सारु राष्ट्रीय मंच रा रूप मांय काम करेला। ई कार्यक्रम मांय न्यारा–न्यारा हलकां रा 700 उं बत्ती नुमाइंदा भेळा व्हेला।

000

आथूणी विक्षोभ रा असर उं प्रदेश रा न्यारा–न्यारा हलकां मांय व्ही बिरखा उं घणखरा जिलां मांय तापमान मांय कमी आई है। लोगां ने हल्की ठण्ड महसूस होवण लागी है। आज जैसलमेर अर श्रीगंगानर जिलां मांय कुछ ठोड़ा तेज हवा रे साथे बिरखा व्ही। वठे ई लारला 24 घंटां मांय अगूणी राजस्थान रा कुछ हलका मांय हळकां उं मंजला दर्जा री बिरखा व्ही। आज संवारा केई हलकां मांय धुंध निजर आई। डीग जिला मांय लारला दो दिन उं व्हे री बिरखा अर तेज हवा काश्तकारां री चिंता बधा दी है। बिरखा उं केई ठोडां काश्तकारां री फसल माथे बुरो असर पड्यो है। मौसम विज्ञान केन्द्र जयपुर मुजब आज जैसलमेर, बाड़मेर अर आरे–सारे रा जिलां मांय हळकी बिरखा होवण अर राज्य रा दूजा हलकां मांय मौसम साफ रेहवण री आस जताई जी है। एक दूजा आथूणी विक्षोभ रा हळका असर उं जोधपुर, बीकानेर संभाग अर शेखावटी हलकां मांय काले बिरखा होवण री आस है। ई बीचे प्रदेशभर मांय बत्ती रो तापमान 30 डिग्री सेल्सियस उं नीचे दर्ज करी ज्यो। मौसम केन्द्र मुजब आवता तीन दिनां मांय तापमान मांय 5 डिग्री सेल्सियस ताई री बधवार व्हे सके है।

000